



ALLY SYKES, PETER COLMORE NA JIM BAILEY

Katika moja ya vitu nikimuhusu Bwana Ally Sykes ni jinsi alivyokuwa hodari

wa kutunza nyaraka na kumbukumbu. Alikuwa na tabia ya kuweka katika jalada chochote atakachokuandikia au wewe utakachompelekea katika maandishi. Nyaraka zote za TAA na

TANU alikuwa akiziweka kwenye "safe," na zile za kawaida akizihifadhi katika "filling cabinet" na akijua majalada yake kwa majina. Utasikia akimwambia secretary wake Bi. Zainab, "Hebu nipe "file," la fulani." Nina hisi hata mimi amenifungulia jalada ingawa sikupata kuliona kwani iko siku alinitolea "notes" niilizochukua katika mazungumzo tuliyofanya miaka 20 iliyopita. Nilipigwa na butwaa.

Bwana Ally alikuwa na picha nyingi sana za wakati wa kupigania uhuru na akizitunza kama nembo ya jicho. Katika moja ya vitu nikizozana na Bwana Ally Sykes ni nyaraka zenye taarifa za taifa hili yeye kukataa kuzikabidhisha kwa Tanzania National Archive (TNA). Bwana Ally alikuwa na kisa na sababu za kuamua kukaanazo mwenyewe nyaraka zake. Alipata kunieleza mkasa uliomfika katika siku za mwanzo za uhuru kuhusu hizo nyaraka hiyo kwake likawa funzo.

Hii picha nilipiga na Bwana Ally Muthaiga Country Club Nairobi tarehe 21 May 1989. Hii Muthaiga Club ni "exclusive club," ya "millionaires" na ni Waafrika wachache sana utawaona katika club hii. Bwana Ally alikuwa mwanachama toka mwaka wa 1967. Nilikuwa kila nikenda Nairobi Peter Colmore akinialika hapo club na tukizungumza mengi katika historia ya Afrika Mashariki katika miaka ya 1950 hadi 1960.

Peter Colmore

Jina lake hasa ni Peter Dashwood Murray Colmore. Ilikuwa kupitia Peter Colmore nikaweza kuandika historia za wanamuziki mashuhuri kama Frank Humplink, Mwendu Jean Bosco na Eduardo Masengo. Hapo Nairobi ndipo Ally Sykes alipoanza siasa mwaka wa 1947 alipotoka Burma Vita Pili ya Dunia na ndipo alipojuana na wanasiasa wa wakati ule hapo mjini kama Jomo Kenyatta, WW Awori, Tom Mboya na wengineo. Wakati huu alikuwa kijana mdogo sana wa miaka 20 na alikuwa akihudhuria mikutano ya siri ya Mau Mau. Kwa hakika nimesoma mengi kutoka kwa Bwana Ally Sykes na siku zote akinijulisha kwa watu kama mtoto wake. Watu wote alionijulisha kwao niliweka kumbukumbu zao katika mazungumzo yetu. Alipokufa Peter Colmore February 2004 taazia zilizoandikwa na magazeti ya Kenya zilikuwa za kurashiarashia. Taazia niliyoandika mimi kutoka Dar es Salaam ilichapwa na The East African na walistaajabu imekuwaje mimi nimemjua mtu huyu kwa kiasi kile.

Mimi niliwajibu kuwa Peter Colmore alikuwa baba yangu. Lakini hata kabla sijakutana na Peter Colmore nikiwa mtu mzima mwaka 1995 nikimjua toka utoto wangu. Ofisi yake ilikuwa karibu na nyumba tuliyokuwa tukiishi Mtaa wa Lindi mwisho karibu na Arab Street (sasa Nkrumah).

Jim Bailey

Bwana Ally alinijulisha kwa Jim Bailey. Jim Bailey ndiye alikuwa "owner" wa gazeti la Drum Magazine likichapwa Johannesburg. Afrika Kusini wametengeneza Filamu ya maisha ya Jim

Bailey inaitwa "Drum." Nilimsaidia Jim Bailey kupitia mgongo wa Bwana Ally Sykes kuhariri na kuchapa kitabu cha Nyerere cha picha: "Nyerere of Tanzania." Nilimshangaza Mzungu kwenye ndege tukielekea Johannesburg ambako yeye ndiko kwao nilipomwambia kuwa mimi ni rafiki ya Jim Bailey. Ikaadifu kuwa wao walikuwa majirani. Nikamwambia kuwa nataka nimtafute sahib yangu nikifika Johannesburg. Alinipa pole. Akanambia Bailey tumemzika mwezi uliopita. Bailey ameacha Bailey African History Archive, Johannesburg na ameifanyia historia ya Afrika hisani kubwa sana. Huu ni mkusanyo wa picha na makala kuhusu harakati za kudai uhuru wa Afrika pamoja na mengi katika ukoloni.

